

Ислом ақийдаси асосида яшайдиганлар



16:18 / 04.10.2021 3028

Аллоҳ таоло Қуръони Каримнинг Оли Имрон сурасида шундай марҳамат қилади:

اَوْنَمَّآ نِيْدَلْاُوْ يَبِّنْ لَّا اَدَّوْهُ وُعَبَّبْتَا نِيْدَلَل مَّيْهَارْبَابِ سَا نَلَّا يَلْوَا نَّ اِنَّا
نِيْنَمُّمُّلَّا يَلْوُوْهُ لَلَّاوْ

Албатта, одамларнинг Иброҳимга ҳақлироғи унга эргашганлар, мана бу Набий ва иймон келтирганлардир. Аллоҳ мўминларнинг валийсидир. (Оли Имрон сураси, 68-оят)

Ҳамма ўзини Иброҳим алайҳиссаломнинг меросхўри, деб даъво қилаверади. Биров «У киши яҳудий бўлган, шунинг учун унга биз ҳақлимиз», деса, бошқаси, «У киши насроний бўлган, шунинг учун унга биз ҳақлимиз», дейди. Яна бошқалар ўз билганини айтади. Ҳолбуки, бу

масалани Аллоҳнинг Ўзи ҳал қилган:

Аввало, **«Албатта, одамларнинг Иброҳимга ҳақлироғи унга эргашганлар»**, яъни ўзлари ҳаёт даврларида у кишига иймон келтириб, йўлидан юрганлар ва у киши ўтганларидан кейин ҳам эргашганлар.

Кейин **«Мана бу Набий»**, яъни Муҳаммад алайҳиссаломдир. Энг содиқ гувоҳ бўлмиш Аллоҳ таолонинг хабарига биноан, улар икковлари Исломда биргадир.

Яна одамларнинг Иброҳим алайҳиссаломга ҳақлироғи Пайғамбар Муҳаммад соллаллоҳу алайҳи васалламга

«...иймон келтирганлардир».

«Аллоҳ мўминларнинг валийсидир», яъни дўстидир, ёрдамчисидир, ҳомийсидир.

Бу нарса одамларни, инсониятни бирлаштирувчи асосий омил ақийда эканини билдиради.

Кенгроқ ўйлаб кўриладиган бўлса, одамларни бирлаштирадиган бир неча омиллар бор, жумладан, жинс, қавм, тил, табақа, танасининг ранги ва ҳоказолар. Лекин буларнинг бари тор доиралар бўлиб, инсоннинг ихтиёридан ташқари нарсалардир. Агар одамларнинг бирлашиши жинс асосида бўлса, ҳеч ким ўз жинсини ўзгартира олмайди. Шунингдек, қавм-миллат асосида бўлса, ҳеч ким миллатини ўз хоҳиши бўйича танламаган. Агар бирлашиш тил асосида бўладиган бўлса ҳам, бирор тилда тили чиққан одам уни бошқа тилга ўзгартиргани билан барибир ўша тил эгалари билан эл бўлиб кетолмайди.

Шунингдек, табақа ёки тананинг рангини ҳам ўзгартириб бўлмайди.

Ислом ақийдаси асосида яшайдиганлар эса Аллоҳнинг дўстлари, бир оиланинг аъзоларидир. Уларнинг бирлашишига йиллару асрлар, маконлару ватанлар, миллатлару жинслар, тананинг рангию табақалар тўсиқ бўла олмайди.

«Тафсири Ҳилол» китоби асосида тайёрланди